

武經總要

十

大

小

大

小

大

欽定四庫全書

武經總要前集卷十六下

宋

曾公亮等

撰

邊防

北番地

燕京州軍十二

關口

幽州四面州軍

西京州軍十一

雲州四面諸州

戎狄舊地

中京四面諸州

東京四面諸州

上京四面諸州

番界有名山川

奚 渤海 女真附

北番地里

契丹其先與奚異種同類俱為慕容氏所破竄于松漠之地後居和龍之北遼澤間遼澤去榆關一千一百里榆關去幽州七百里其地南接海東際遼河

西包冷陁北界松陁山川東西三千里唐置契丹  
王兼松漠府都督光啓中中原多故北邊無備其  
王欽德稍蠶食韃靼奚室韋之屬咸被驅役族帳  
寢盛天祐末遂僭號欽德政衰別部首長阿保機  
彊大乃攻渤海扶餘城下之徙其人而盡有其  
地又陷中國平營二州石晉有國割幽薊瀛漠涿  
檀順新媯儒武雲應寰朔蔚十六州賂之周世宗  
復收瀛漠本朝陷易州今契丹盡有奚韃靼室韋

渤海扶餘及中國十八州而據其地武豐州舊在  
朔中朝廷置吏領之今亦陷其國東南界新羅熟  
女真東際生女真東北控黑水靺鞨西抵夏國西  
南距河東岢嵐火山寧化軍代忻并州南濱真定  
州西山界洎保雄滄州東南泛海至京東登萊州  
燕京州軍十二

中原舊地幽州古冀北之地舜置幽州東有朝鮮遼東  
北有樓煩白檀西有雲中九原南有滹沱易州唐

置范陽節度臨制奚契丹理幽州自石晉割賂戎  
主建為南京又改燕京東至符家口三百九十里  
正東微北至松亭關四百五十里西至中山口百  
里正西微北至居庸關一百一十里東北至中京  
出北門過古長城至望京四十里又過溫餘河大  
厦陂五十里至順州東北過白璵河七十里至檀  
州自此漸入山五十里至金溝淀入山屈曲無復  
里堠過朝鮮河九十里北至古河口兩傍峻崖有

路僅容車軌八十里至新館過鵬窠嶺四十里至  
卧如來館又七十里至柳河館過松亭嶺七十里  
至打造部落又東南行五十里至牛山館八十里  
至鹿兒峽館又九十里至鐵漿館自北塹山七十  
里至富谷館又八十里至通天館又二十里至中  
京南至雄州出南門渡盧孤河六十里至良鄉縣  
又過琉璃河范水涿水至涿州共十里又七十里  
至新城縣又四十里至白溝河渡河至雄州

關口

幽州四面平川無險阻可恃惟古北口以來據其要害  
可設兵屯置堡砦唐范陽節度之地古北口松亭  
關野狐門等路並立保障至今石壘基堞尚存有  
入番之路十數

大林口 幽州正南東北至監治北至灤河石城縣西  
北至符家口山路

符家口 幽州正東三百四十里正東至灤河即灤州

北至平州山路之西屬幽州東屬平州

松關亭 關東北五十里至灤河關城自幽州東趨營

平路甚平坦自古匈奴犯邊多由此路幽州東北  
四百八十里北趨澤州路至中京四百五十里至  
西平州薊州有櫃安燕氏二山口通車馬

古北口山 幽州正東二百七十里兩邊陡峻中有路  
僅容車軌本范陽防扼奚契丹之所最為隘口

得勝口 山口在幽州正北山口盤道數層俗名思鄉

嶺南至檀州北至安州

宋王口 幽州北一百二十里居宋王山口之地屬山

後

曹王口 幽州微北一百二十里居曹王山口之北屬

山後

居庸關 幽州西北一百二十里關之西北二十里即

居庸關山一路西至媯州一路北至儒州

牛山口 在幽州西

紫荆嶺口 幽州西南二百里嶺口之南屬易州北即

山後蔚州界

幽州四面州軍

涿州古涿鹿之野軒轅皇帝戰蚩尤之地漢高祖置涿  
州郡隋煬帝伐遼開永濟渠二千里泛龍舟通涿  
州是也新城即古督郵亭之地州之北有涿水范  
水琉璃河入幽州界南至漠州一百二十里東北  
至水一百二十里

祁溝關 東北至涿州四十里西北至易州六十里

薊州漁陽郡隋置總管府唐開元中分漁陽玉田縣置  
州東至平州三百里西至幽州二百一十里南至  
海口百八十里北至廢長城寨二百三十五里東  
南置平州一百八十里東北至盧龍戍一百里西  
北至檀州二百七十里

檀州治密雲縣漢李廣弭節白檀是也隋置州為燕之  
邊陲障塞唐置威武軍東至薊州二百一十里西

至幽州界北長城四十五里南至幽州五十五里  
東北至長城障塞百里西北至媯州二百五十五  
里

順州治懷柔縣唐開元中置東至薊州一百三十里南  
至幽州九十里東北至檀州八十里

平塞軍在涿州西南北至易州四十里南至廣信軍四  
十里

易州漢涿郡固安縣地隋為上谷郡唐武德中平竇建

德改為易州石晉割賂北主尋為定武軍節度孫  
行友襲取之雍熙中再陷有駁牛山五迴嶺易水  
徐水東牛欄二砦南北莫州百八十里廣信軍七  
十里東北至幽州二百一十里西北至紫荊嶺一  
百里趨飛狐口至蔚州三百八十里西南至定州  
一百四十七里

灤州治義豐縣唐末劉守光據州叛暴虐尤甚營平之  
地於中國為南海隔其民不得已歸於北虜會石

晉割賂燕薊易定帥王都盡驅其民入契丹因以  
灤河為名以居之縣邑猶不改望都安喜之名東  
北灤河按賈耽所說自薊州西北一百二十里至  
鹽城把守又至渡灤河至盧龍鎮西至石城九十  
里南至海一百二十里北至平州四十里

遼州古遼西北之地臨榆關在州東北五里先是平渤  
海遷其民置州以居之仍名其邑曰遷民東至萊  
州七十里西至潤州四十里南至海州三十里北

至利州四百五十里

潤州盧龍塞東北至遼東澤唐光啓中契丹有營平之  
叛既討平遷其部落置州以居之取潤水為名東  
至遼州四十里西至榆關四十里南至海三十里  
北至中京五百五十里

平州盧龍郡漢屬遼西郡三國志曹公北伐烏桓田疇  
從盧龍道引軍塹山堙谷五百里登白狼山即此  
路隋置北平郡有長城臨渝宮碣石有玄水盧水